

Minister Arthur Dowers

Centralisacion di servicionan ta spaar presupuesto di Enseñansa 160 mil florin pa luna



DIALUNA mainta na Bestuurskantoor a tuma luga e firmamento di e financiamiento pa e renobacion y expansion di e edificio di loke antes tabata John F. Kennedy School na Oranjestad. E edificio pa hopi aña tabata bandona y decai, pero awo danki na colaboracion cu SOGA, Stichting Onroerend Goed Aruba, tur servicio di gobierno relaciona cu maneho di Enseñansa lo ta ubica den e edificionan aki.

Minister di Husticia y Enseñansa, Arthur Dowers a subraya cu e ta satisfecho cu e inversion aki di parti di SOGA, cual lo traduci su mes den 160 mil florin menos pa luna cu lo wordo gasta na huur. E huur cu lo wordo paga na SOGA lo bin di un otro presupuesto y lo provee asina 160 mil florin pa luna mas pa inversion directo den enseñansa y desaroyo di nos hobennan.

E mandatario a bisa cu e ta contento di participa na un vision unda cu ta trece tur departamento cu tin di haci cu maneho di enseñansa hunto, incluyendo Inspeccion di Enseñansa, Departamento di Enseñansa, e departamento encarga cu maneho di scolnan publico, cual awo ta ubica den mas of menos cinco diferente edificio.

Cu e realizacion di e compleho di edificio aki lo percura pa servicio na cliente ta hopi mas eficiente, como tambe lo mehora e cooperacion y comunicacion entre departamentonan.

E edificio lo inclui tecnologia moderno y lo cumpli cu e normanan moderno pa seguridad y medio ambiente y ademas lo crea condicionnan di trabao mas agradable pa e empleadonan.

Minister Dowers a splica cu e tin hopi diferente servicio bao di su maneho, cu esaki tambe ta bin hopi edificio y e discusionnan tocante aspectonan manera mantencion y calidad di aire entre otro ta na ordo di dia. E discusionnan aki lo bira asunto di pasado pa loke ta trata Enseñansa ora cu e edificio aki ta cla, pa cual SOGA ta garantiza tambe mantencion, calidad y continuidad.

E unico servicio cual ta keda den su mesun edificio, cual ta un edificio nobo ubica na Dakota y a wordo financia pa Fondo Desaroyo Aruba, ta e Centro Multidisciplinario (MDC).

Den e compleho nobo tambe lo brinda un espacio na Parlamento Hubenil y Departamento di Cultura. Den mayoria otro pais cultura y enseñansa ta traha hopi cerca di otro y na Aruba ta e inten-



cion pa tin mas acercamento entre e dos departamentonan aki. Eventualmente lo por acomoda e edificio di UNESCO tambe aki.

Minister Dowers a gradici su coleganan minister den Gabinete Mike Eman y tur otro persona y instancia cu a traha pa realisa e proyecto aki, cual lo provee na prome luga cuponan di trabao den construccion y ya realisa lo contribui grandemente na hisa e calidad di servi-

cio y trabao pa nos hendenan. Bishita Dowersblog <http://www.arthurdowers.com/dowersblog> pa mas informacion y potretnan di e diferente proyectonan di Ministerio di Husticia y Enseñansa andando, como tambe esunnan ya completa manera La Salle College, Dominicus College, Abraham de Veerschool y Aruba su prome scol pa HAVO y VWO publico, Colegio San Nicolas.